

Dañ auch ebē solcher gestalt die Lacedemonier vnder dem Hauptman oder Heerführer Pausania/so Agesipolidis Son gewesen / im Plateenser krieg mit kleiner hilff vast gerings Volcks / ein groß trefflich Heer der Persier vberwunden / mit herrlichem Sieg vnd rhumreichen Triumph/haben sie von der erobertē Beut ihrer Feind zu solcher ewiger rhumreicher Siegung/ ein gewaltig Gebew / zu einem Siegzeichen auffführen lassen / darin die gefangenen Persier in leblicher Contrafactur persönlichen zu ewiger gedechtnuß/in ihrer Barbarischen Kleidung/damit sie sonderlichen pracht trieben/gestellet/zu ewiger schandt vnd schmach / damit auch ire Feind auß solcher ihrer Contrafactur erschrecken / vnd sich entsetzen solten ob der Lacedemonier macht/vñ aber ire Bürger ab solchem Exempel trefflicher tugentmütiger vnd behertzter wurden / in solchen ehren vnd tugendē sich fürbaß zuüben/vnd jr Vatterlandt bey Freyheiten zuerhalten. Dañ solche bildtnuß der Persier hernach gar mancherley weiß gemelter vrsach halben in die Gebew gebraucht worden seind / an statt der Seulen vnd Trager/zu vnderhaltung mancherley zierdt vnd gebelck / damit die Gebew hin vnd wider mit großem fleiß vñ kunst gar mancherley frembder gestalt reichlichen geziert worden seind. Aber dergleichē Historien seind noch andere viel/so dem Architecto oder fleissigen Bawmeister zu wissen nicht weniger dienstlich seind. Aber allein die Philosophia machet den Künstreichen Bawmeister erbarlich/grösmütig/vnd dempt in im allen stoltz vnd hoffart / also das er mehr dadurch zu der gerechtigkeit vnd freyen auffrechten gemüt / vnd der redligkeit gezogen wirt / getrew vnd auffrichtig zuhandlen/nicht geizig oder finantzisch / so fürwar einem solchen Künstreichen Werckmeister vor andern vast vbel anstände/dieweil kein Künstlich Werck on trew vnd glauben nimmermehr vollbracht werden mag. Darumb sol der Bawmeister in keinē weg zu vast Geltgierig sein/ auch sich auff Geschenck zu nemen oder empfaben nicht fleissen / sonder dermassen sich ernsthaft stellen/das er ein gut ansehen hab / vñ im ein gut lob vnd namen erhalt/solchs wirt er in der Philosophiei gnugsam vnderricht. Verner sol er auch Natürlicher ding vrsach vnd schickung zimlich wissen haben/des im die Philosophiei in dem theil so die Gelerten Physiologiam nennen / auch gnugsamen bericht gibt/darinn er sich mit sonderm fleiß embfiglich üben sol/dañ solche begreiffst gar mancherley wunderbarliche vrsachen/die im nicht wenig nutz vnd gebreuchlich sein mögen / in leitung der Wasser nach mancherley verenderung der Geng / in vmbleitung durch Berg/Thal / vnd eben Feldt / in welcher mancherley leitung sich auch manigfaltige verenderung des Luftts begeben / vnd gewicht des

a iiij Wassers